



D. O. M.
POSITIONES ANATOMICÆ
ET
CHIRURGICÆ.

EX ANATOMIA.



U T in Machinâ hydraulicâ ad liquorum circuitum liberum & perfectum vasorum requiritur integritas omnimoda, sic & in corpore humano. Quâcumque enim de causâ in hoc vitietur, effunduntur humores, & nisi resolutionem subeant prosperam, intrâ partes corporis grassantur, fluctuant, putrescunt, indurescunt-ve, tumoresque exhibent, quorum species, licet ad quatuor ab antiquis, ratione humoris stagnantis, revocatæ, tamen velut innumerae respectu partium humores excipientium spectari possent. Illas igitur indigitare omnes, opus longè diuturnius: ideo unam tantum

à seroso latice oriundam, & scrotum sæpè sæpiùs afficientem; sedis ipsius exploratione præviâ, jam jam considerabimus.

PARS in viris infra abdomen pendula, corrugata, ipsius cuti & mentulæ continua, pinguedine destituta (a), plurimis glandulis sebaceis munita, pilis & pilorum bulbis instructa, in dextrum finistrumque latus, futurâ fictâ raphe dictâ, à radice Balani ad anum usque bipartita, bursam æmulans, *Scrotum* dicitur.

CORPUS quoddam panniculosum, carneum, *Dartos* nomine, pubis inferiore ramo ex utroque latere affixum, nervis, arteriis, venisque scroto communibus refertum, ita ipsimet scroto interiùs adhæret, ut unicuique testis loculum præbeat, & inter utrumque, septum efformet (b): totum, suâ contractione, juxta diversos viriles affectus, plus minùs-ve corrugat scrotum.

PROPRIA, illis apertis, sese offerunt involucria, quorum exteriùs cellulare & prò peritonæi processu ex æquo habendum, vasorum præparantium non solummodò plexum, sed & ipsum-met testem, vaginæ ad instar, continet ac fovet: illud, *vaginalem* tunicam quæ in superiorem cellularem, ab annulo inguinali ad epididymidem, ubi intimè hæret, & in inferiore ab epididymide ad totam testis superficiem, ipsius involvendi causâ, expansam, dividitur: hanc *peritæstem* dixerunt.

VAGINALIS à latere externo, altera fibris carneis à musculo obliquo interno & transverso ad exteriorem testis faciem emissis constans observatur membrana: à substantiâ, *Musculus*; à munere quo fungitur, *Cremafter* seu suspensor; & à colore *erythroïdea* seu rubra nominatur.

ULTIMA denique sive testis tertia membrana, propriæ ipsius substantiæ immediatè adjacens, dura, crassa, valida admodum, exteriùs lævis, madida, albicans, interiùs inæqualis, didymorum vasculis exquisitissimis suo loco stabiliendis aptatas suppeditans membranas *Albuginea* conspicitur.

Ex tam ritè ordinato involucrium apparatus organum quod-

(a) Mangerus in Theatro Anatomico lib. 2. cap. 10. asserit in quibusdam obesius pinguedinem observasse.

(b) Vid. Ruisch, & Rau, de Septo Scroti, & Morgagn. adversar. Anat. 1.º pag. 20.

dam insigne, & notatu dignissimum ab ipsis protegi, nonne con-
jicere est? testem videlicet præcipuum propagationis ministrum
sub ipsis reperiēs: figuram ovalem præ se ferens, intus congeriem
minutissimis vasculis, albicantibus, diversimodè intortis (a).
Semen fecerentibus, nervis, arteriis, venisque tum sanguineis
tum lymphaticis mirificè implicatis conflatam exhibet: huic cor-
pusculum oblongum, planum, horum-ce vasorum veluti coadu-
natione compositum, Epididymus seu parastata incumbit, quæ
sursùm progrediens, ita crassitie minuitur ut, uno ductu, in vas
deferens (b) spermatici funiculi texturam ingrediens desinat.

EX CHIRURGIA.

QUANTUM artificium, quanta naturæ sapientia in didymo-
rum tentoriis elucescat, præ tamen sorte humano generi ni-
mùm solitâ, à latice involucrorum, quin & didymorum inco-
lunitati dicato, ita nonnunquam infestantur, ut ex ipso salutis
fonte hydrium immanem emergi non malè dixeris. Hunc varias
scroti regiones occupantem, modò diversantem, modò serpen-
tem, aliquandò corrodentem, attentæ praxis ope, facillè videre
est. Ut ut sit, ubicumquè scroti, sub specie tumoris aquosi, sese
prodat, *Hydrocele* dicitur.

A loco quem invadunt aquæ, desumuntur præcipuè hydroceles
differentiæ; itaque si textus cellularis adæquetur, per *Infiltrationem*;
si verò quibusdam in membranis tanquam in loculo coacerventur,
per *Effusionem* erit hydrocele.

PRÆTER eas quas fieri cognoscimus in marsupiorum textu cel-
lulari, & tunicâ vaginali tum funiculi spermatici (c), tum testis,
alias exposuerunt veteres, nonnullique recentiores, quarum undæ
spatium dantum inter & cremasterem, hunc inter & tunicam vagi-
nalem, necnon intrâ lamellas tunicam vaginalem testis consti-
tuentes positum, ipsam-met denique testis substantiam, occu-
pant. Nostram de illis inquirenti, non minùs neotericorum expe-
rientiæ quàm veterum auctoritati consulentes, seorsim aperiemus
sententiam.

(a) Vid. Compend. Anat. Heist. tab. VI. fig. 24. edit. 1748. Cheseld. Anat.
tab. 28.

(b) Vid. Graaf. Tract. de Virorum organis generationi inservientibus.

(c) Vid. Boerhav. Aphorism. pract. §. 127.

FLUIDORUM effusio (a), stasis, perversio, vasorum dilatatio; quid quid arterias aut venas comprimere, inflammationem producere potest, ut impura venus, Gonorrhæa suppressa, sarcocèle, cirsocele, compressiones, vis externa qualibet, topica nimis percutientia, vita cælebs quam ratam non habuit temperamentum, tanquam causæ legitimæ hydroceles; ascites verò (b), in scrotum vesicæ urinariæ prolapsus, tanquam spuria habeantur.

HYDROCELIBUS sive per effusionem, sive per infiltrationem sua sunt signa propria. Cutis nimis tensa, lævis, opposito lumine perspicua, mentula longior, crassior, pellucidior, balanūs paraphimosi constrictus, hydrocelem per infiltrationem indicant.

CUTIS neque tam tensa, lævis, lucida, sed plūs minùsve corrugata, nonnunquam oblitteratā mentulā, hydrocelem per effusionem designat.

A causā, sede, tempore, ætate, accidentibus deducenda prognosis, variaque instituenda curandi methodus.

GENERALIORIBUS remediis ritè adhibitis, victu scilicet tenui, diureticis, phlegmagogis, necnon topicis v. g. spiritu camphorato lumbricorum oleo immixto, cataplasmatibus resolventibus, aquā calcis spiritu vini acutā, hydrocelis benignæ & idiopaticæ obtineri potest cura; si verò sympatica, causæ remotæ, pro naturā suā, antiscorbuticis v. g. si scorbuticum sit vitium, antivenericis, si venericum, incrassantibus, si ab humorum dissolutione, diluentibus, si ab eorum crassitie, feliciter debellantur, adhibendaque præ cæteris fascia, quam *Suspensorium* vocamus.

(a) Ex fluidis hydrocelem per effusionem efformantibus, urinam quandoquē, hydroceli non levioris momenti ansam dare observatur. Cum verò hæc effusio, vesicæ aut urethræ vitium supponat, in istius vitii curā reponitur hydrocelis curatio; de quā proinde differentes à nostro aberraremus proposito; hic tantum annotare sufficiat gangrenam hydrocelis ab urinā effusā productæ comitem, cortice Peruviano in spiritu vini per 24 horas infuso feliciter sanari.

(b) Saccus peritonæi Enterocœlem olim continens, sed, propter adhesionem vimiam cum annulo, in abdomen non refusus, ab ascite undas recipere potest; tunc erit species quædam hydroceles quæ spuria tantum haberi debet, quia in testis aut funiculi spermatici involucri non continetur. Hujusce hydrocelis curam indicasse videtur Hildanus, licet præjudiciis excæcatus, tunicam nempe vaginalem ab ipso peritonæo oriri reputans; aquā incisione eductā, hujusce tunicæ parti superiori filum injiciebat, ut abdomen inter & scrotum aquis commercium intercluderetur. Observat. 66. centur. 4. Hildanum errasse tum circā curam, tum circā sedem hujusce hydrocelis, ascitæ naturā, & partium structurā præcognitis, observare non arduum.

3

PRÆDICTIS hisce remediis, si non cedat hydrocele, ad operationes Chirurgicas recurrendum, quando-quidem in humoris evacuatione, & sacci excisione tota debet esse indicatio.

INCISIONES & scarificationes in hydrocelibus membranæ adipsæ, tensione nimia aut putredine concomitatis, sunt celebrandæ, antiseptica insuper non omittenda.

QUOAD operationes Chirurgicas in hydrocele tunicæ vaginalis instituendas, vel ad curam palliativam, vel ad perfectam tendunt.

ACUM triquetram, erecto, vel in lecti margine ægro sedente, per infernam & externam scroti partem, ad transversum pollicis circiter longitudinem, ne testis lædatur, adigendo; è tubulo, ut humor collectus emittatur, educendo, & scroti contractionis favendæ causâ, splenia crassa spiritu vini, aquâ calcis, vino calido &c. imbuta admovendo perficitur hydroceles curatio, quæ nonnunquam in hydrocele recenti perfecta est (a), sed in aliis palliativa tantum, & ideò post aliquot menses, absque ullo ægri incommodo, iteranda.

AQUAS, temporis lapsu, acredinem quamdam induere, & subrubras, luridas, grave-olentes, per tubulum effluere, funiculi vel testis vitium sub indicantes, aut etiam præ tumoris antiquitate & magnitudine, multum incrementum scrotum, crassitiemque nimiam acquirere cystidem quàm ut, elaterio restituto, in pristinam molem restitui valeat, hæc infrequenter observatur: tunc ad perfectiorem curam recurrendum.

TRIPLICI medio, setaceo scilicet, causticis, & ferro hæc obtinetur; quæ singula licet non semper æquè præstent, alterum tamen alteri quandoque non immerito præferri debet.

IN hydrocele recenti tunicæ vaginalis funiculi spermatici, quæ ut plurimum cellulosa, setaceum digestivis, postea epuloticis illinitum, dum cellulæ nec magis distensæ, nec crassæ, proponimus.

MEDIANTE acu parum incurvatâ, satquè latâ, ad plures dirumpendas cellulas, per superiorem, lateralem & externam scroti

(a) Conf. Scultet. Armament. Chirurg. tab. XL. fig. 2.

partem ad inferiorem, juxta longitudinem tumoris, trajicietur. Setacei sic trajecti, & in vulnere relictī, usque ad perfectam detersionem & cicatricem accedentem usus renovabitur: quo medio cietur inflammatio nonnisi suppuratione cellularum sedanda: quā suppuratione cellulæ quæ, propter subitam, post incisiones absque setaceo, depressionem, difficile admodum destruerentur, paulatim è contrā penitusque deleantur (a).

Si antiquior esset tumor, quod cellularum crassitiem, aut amplior, quod cutis attenuationem supponeret; tunc incisionis ope, quā, salvo funiculo, vel detectæ distraherentur & separarentur cellulæ plenæ adhuc & ingurgitatæ, vel tota tolleretur cutis attenuata, aggredienda est curatio.

A causticorum usu, tanquam inflammationem, divulsionem, febrem, erosionem, hæmorrhagiam promovente, abstinendum, nisi, inciso tumore, quædam detegantur concretiones (b) cuti pertinaciter hærentes, atque difficilius in suppurationem abeundæ; quo in casu, cellulis quāquāversum apertis, humor est ita eliminandus, ut, subiecto oculis funiculo, cavum plumaceolis impleri queat, quorum superficies, præsertim versus tegumenta, causticis idoneis, suppurantibus, deterſivis, epuloticis, alternâ vice obliniatur.

HUMORUM acrimoniâ eroduntur cellulæ vaginalis tunicæ funiculi spermatici, ita ut in ampliâ & unicâ cavitæte contineantur? proe nimia humoris effusi quantitate, nimium distenditur tunica vaginalis testis? tunc hæmorrhagiam, inflammationem, febrem (c), gangrænâ, abundantiores suppurationes, membranarumque majorem deperditionem pedissequam amovere, Chirurgi præcipua mens. Idcirco triquetrae acûs ope, humoribus eductis, scrotum corroborantibus fovere, simulque suspensorio continere debet,

(a) Marinus hoc in casu sic sese gerebat..... tumorem in parte superiori & externâ, id est mox ab inguine, incidebat, ut turundæ ex cerâ & oleo paratæ, digiti crassitudine, trium digitorum transversorum longitudine, cujus apex sensim gracilescens paulò incurvabatur, pateret aditus; unguento de Althæâ inunctam in scroto per 24 horas relinquebat turundam de die in diem breviorē efficiendam, & digestivis, deterſivis, epuloticisque vicissim obliniendam, pag. 230.

(b) De hujusmodi concretionibus luculentè differuit Clariss. Bertrandi in Reg. Taurinensi Universitate Chirurg. Mag. & Acad. Reg. Chirurg. Paris. Socius Extraneus, in cœtu privato ejusd. Acad. an. 1753.

(c) Vid. Sharp. pag. 113. *Recherches Critiques.*

7

donec humoris recens effusi collecta quantitas ; multò tamen minor educta , appareat : quo tempore , scalpello aperire non dubitet , cystidis suppurationem digitis , folio myrtino , levibus scarificationibus sese decussantibus , nonnunquam superficiali butyri antimonii illinitu provocet ; nec malè cautos æmuletur , qui totum suppurationis opus naturæ committentes , viscidam , colligatam , partes vicinas adulterantem , gangrænam sæpè allicientem , per longum tempus , efformari sinunt materiem.

DIGESTIVIS , deterfivis , cicatrisantibus , necnon , pro re natâ , corroborantibus , ad corrugationem scroti , adjuncto suspensorio , absolvenda curatio.

Si ea sit sacci crassities , ut , post peractam acu puncturam , scrotum contrahi nequeat , inutilis fieret methodus proposita ; Causticorum applicatio , propter gravia accidentia , quæ membranarum , præcipuè callosarum , viscidam & putridam suppurationem antecedere consueverunt , periculosissima ; Ergò in totius cystidis , & scroti huic adherentis ablatione unica spes remanet.

OMNIBUS diligentissimè præcautis , ritè collocatur æger , juxta longitudinem scalpello inciditur tumor , adeò ut testis , sicuti par est , detectus , à scroto resolvi queat ; quo sejuncto , quænam sit ipsius conditio non animadvertere , ingentem noxam autumamus ; vel enim sanus , vel affectus . Si sanus , minister illum , mediante linteo vino calido imbuto , sublevans , dum cystis excidetur , naturæ de votis , proteget . Per curationis tempus subsequens , testem pensilem linteo hordei & melissæ aquarum mixturâ imbuto involvere , vulnusque methodo debitâ ad supurationem , incarnationem . & cicatricem perducere supererit . Si verò sit affectus , diversa , pro variâ affectionis specie , celebranda encheiresis (a).

(a) Sharpius asserit incisionem juxta longitudinem tumoris ut plurimum sufficere ad curationem perfectam hydrocelis tunicæ vaginalis... pag. 111 , siquidem partium distensionum corrugationem producendo , earumque inter se & testem adhæsiōi favendo , exstillantia obturantur vasa , oblitescitque excipiens cavitas pag. 110. si quibusdam in casibus frustulum cutis & cystidis ovale tollere cogitur , hæc ei crudelior videtur operatio ; quæ tamen in eis , juxta nos , sæpè sæpius non sufficeret.

Has , in hydrocelibus recentibus in quibus ultra modum non distenditur cutis , utiles fieri posse fatemur ; sed in quibus nimiam acquisiverit crassitiem , vel nimiam distensionem passus fuerit sacculus , inutilis fieret alterutra incisionis species , ex eo quod virtutem contractilem curationi necessariam amiserint partes.

Rem itaque sedulò perpendentes , censemus Sharpium de reipublicâ bono longe melius meritum fuisse , si , prolixioris nec satis perpensæ censuræ loco utilioris variisque casibus methodi competentis explanationem substituisset , cujus solidis excellentiam dein demonstrasset experimentis.

SARCOMA, schirrus; gangræna testis aut funiculo penitus insita, perfectam, sed leviter tantum, & ab origine, non, nisi cæteris omnibus mediis frustra adhibitis, excisionem requirunt.

VARIAS inter in scroto, hydrocelis curandæ causâ, incisiones celebrandas, vasa densatas per membranas serpentia, valde dilatata, & ferro aperta, hemorrhagiam à Chirurgo non despiciendam, haud rarò suppeditant. Hanc stipticorum ope, & ferè nullo negotio, modò compescet; modò tamen, præsertim ubi diametro majore vasa dehiscunt, ut in septo darti, ad ligaturam, velut ad anchoram tutiorem, illicò confugiet.

QUÆDAM post operationem, licèt cautelâ quâcumque adhibitâ, tunicæ vaginalis portiuncula subsistere potest, tunc lintum carptum, cujus superficiesversus membranam reliquam melle rosaceo cum sufficienti quantitate spiritûs nitri, ad aciditatem; commixto illineretur, altera verò superficies, tanquam pulvinar, funiculo spermatico admoveretur, vulneri imponendum; adjunctâ insupèr deligatione modò laudatâ.

*De L'escav
en bremaois*
Has Theses, DEO JUVANTE, & Præside M. ROCHO DUBERTRAND in Universitate Parisiensi Artium & Chirurgiæ Magistro, Scholarum antiquo Moderatore, necnon Nosocomiorum Castrensium & Regis exercitûs olim Chirurgo, tueri conabitur JOANNES-BAPTISTA DE PENNE, Lascuriensis, eâdem in Universitate Artium Liberalium Magister.

P A R I S I I S,

IN REGIIS CHIRURGORUM SCHOLIS.

Die Lunæ 19^a. Augusti, à sesqui-secundâ post meridiem
ad septimam, anno Domini 1754.

PRO ACTU PUBLICO

ET LAUREA MAGISTRALI.

Typis FR. DELAGUETTE, Chir. Collegii Typographi,